

佛說八大人覺經講義 (八)

寬如合撰

『出陰界獄』者，此出常行精進之目的，亦即唯識論中利樂精進。精進爲能出之方便，陰界獄爲所出之境。

「陰」即五陰「界」即三界。「獄」者，明三界五陰，猶如牢獄桎梏故，今尅己精進，日不足，則繼以年月，不出三界獄，誓不休息，如起信論明「雖是精進，謂念過去久遠以來，虛受一切身心大苦，無有利益」。是故應勤修諸功德，自利利他，速離劇苦。

應如第一覺結文云：「如是觀察，漸離生死」，如是觀察，懈怠爲墮落之由。則當勤精進，應世則學業、事業皆易成，建立家庭幸福，社會福利，國富民強，皆非精進不爲功，今示破煩惱以療治怠病，摧四魔以治懈病，出陰界獄以治墮落之病，是則常行精進之妙法門，是無上醫王療治衆生懈怠墮落之沉痾重病，而復元法身慧命之妙法藥，又何患二死不離，三惑不絕，三界不超，佛說法門無量無邊，法法皆堪見道，門門直到本家，誠難思議，下手易而成功速者，莫若持名念佛，一句洪名，六根都攝，塵既不緣，根無所偶，識心寂然，一念相應，照見五蘊皆空，境智如如，頓入彌陀性海，極樂朗現，又何患惑魔不消，三界牢獄不出？一超直入蓮邦，蒙佛授記，無上菩提，指日可冀。常行精進者，斯得之矣。

丙五，覺知多聞，智慧，去愚痴迷。
第五覺悟愚痴生死，菩薩常念廣學多聞，增長智慧成就辯才。教化一切，悉以大樂。

上來雖明精進，若不廣學多聞，恐成盲修瞎練；多聞不修如說食治飢，故云：「有聞無慧，如把火自燒；有慧無聞，如執刀自割」，聞慧具足，方可自利利他也。

『第五覺悟』者，是徵起第五覺法之詞，警知覺察明悟也。『愚痴生死』者，此明無智慧之過，愚痴是衆生之惑病，卽爲生死之本。迷事曰「愚」，昧理曰「痴」，智理不明，故曰「

愚痴」。古云「六識茫昧」，無智曰「愚」，五根昏迷，不曉若「痴」愚，痴乃生死因，生死是愚痴果，蓋一切衆生，皆因愚痴故作業，作業感生死果，故大佛頂經云：「一切衆生，從無始來，種種顛倒，業種自然，如惡义聚」，泛泛凡夫，固因愚痴而致生死，智理不明，不信三寶，妄作諸愆，從迷積迷，以歷塵劫，喪法身，失慧命，所謂不識苦盡道，不知求解脫，卽知求解脫，而缺乏智慧爲導，每每中途紆曲，求升反墮，可憐熟甚。大佛頂經曰：「諸修行人，不能得成無上菩提，別成聲聞緣覺，及成外道，諸天魔王，及魔眷屬，皆由不知二種根本，錯亂修習，猶如煮沙，欲成嘉饌，縱經塵劫，終不能得」，二種根本者，如大佛頂經云：「一者無始生死根本，則汝今者與諸衆生，用攀緣心，爲自性者。二者無始菩提涅槃元清淨體，是涅槃根本」，不知二本者，愚痴也，知二本者，智慧也，可見愚痴是爲生死根本。

『菩薩常念，廣學多聞，增長智慧』者，良以不知二本，雖精進修行也不爲功，故勸菩薩廣學多聞，增長智慧有智慧則知二本，然後精進修行，方不唐捐，此正示對治方便，以智慧妙藥，療治愚痴重病也。

「常念」則不放逸，念茲在茲也。

「廣學」者，廣博求學，世法則如文史、理化、科學、藝術，佛法則博通三藏十二部經。

「多聞」者，欲窮教典非多聞不爲功，故當親近明師，廣聞經法，方於教理行證，分明不昧，依教悟理，依理起行，從行證果。如觀音大士，從聞思修，入三摩地，初心下手，以多聞爲最，此土耳其較利故，如大佛頂經云：「佛出娑婆界，此方眞教體，清淨在音聞，欲取三摩地，實以文中入」。以聞多故，方知權實邪正，聞多故思亦多，此思非妄想推求，是正思維，思無思之妙，思盡還源，思多故慧亦多，慧多故於一切法無不徹了，深達實相，聞多故，深明教理，思多故依理起行，行行無住，方能

契理。修多故，證亦多，是故多聞廣學；重在思修，方發真實智慧。如圓覺經云：「無令求悟，唯益多聞。」況初心凡夫，圓機未發，須假聞慧以爲進修，宗鏡云：「智慧之光，如日之照，多聞之力，猶膏以助明，以劣解衆生，從無始來，受無量劫，洞然之苦，只爲迷正信路，失妙慧門，狂慧用心，顛倒行事，所以盲無智照，反厭真實慧光，貧缺法財，更怯多聞寶藏，故有慧無多聞，是不知實相，如大暗中有目無所見；多聞無智慧，亦不知實相，如大明中有燈而無眼。」是故多聞方生智慧，增智慧故當多聞，則多聞智慧，兩俱無失，方能成就辯才，教化衆生也。華嚴頌云：「如暗中寶，無燈不可見，佛法無人說，雖智莫能了。」是以說圓頓教，印衆生心，開大旋之門，成無邊之益，若不以此示人，雖有利他，不名盡善。故知廣學多聞，誠爲增長智慧之基也。

「增長智慧」者，慧爲智體，智爲慧用，舉體即用，攝用歸體，故名智慧，又照見名智，了解名慧，亦云「知世諦者，名之爲智。照第一義諦者，說以爲慧。」實則舉智卽慧，言慧攝智，無所分別。法華經云：「諸佛智慧，甚深無量，其智慧門，難解難入。」若能廣學多聞，則聞多，思多，修證亦多，至圓七信，似解似入，初住則成易解易入。證至究竟菩提，則究竟解究竟入，亦由於多聞，增長智慧，方能究竟也。

「成就辯才」由有智慧故，方能圓成備就辯才，以理明詞達，明於心，方達於口，又速疾應機名辯。言含文采曰才，辯才有四：一、法無碍辯，達法無碍故；二、義無碍辯，通義徹理故；三、詞無碍辯，詞說無滯，口如懸河故；四、樂說無碍辯，誨人不倦故，成就此四辯，教化無礙矣。當知廣學如來妙法藏，多聞生慧，方徹了世出世法，而自利利他，斯卽從聞思修，得三摩地不遠矣。

「教化一切」者，具辯才故，教化何難。以如來被下之言教，攝化於羣迷，卽可化邪爲正，化惡爲善，化迷爲悟，化凡成聖，依教修行者，無不得益。「一切」者，徧指九界衆生也。如往生論云：「以大慈大悲觀察一切衆生苦惱」也。

「悉以大樂」者，此出教化一切衆生之所以，明菩薩以慈悲心，觀察一切苦惱衆生，隨其所應而爲說法，令得解脫，以機有種種性欲行解，施教亦當有權、實、頓、漸之不同，皆以大乘爲宗。如法華經云：「隨順衆生說，入大乘爲本。」若廣學多聞，增長智慧，則身心有益，是身意皆樂，「成就辯才」則口樂。

「教化一切，悉以大樂」則滿願樂，亦究竟樂也，自他皆利故。此文亦連貫巧妙，因愚痴致生死，故菩薩當常念廣學多聞，多聞則增長智慧，有智慧則可對治愚痴，有聞慧則有辯才，有辯才則能教化一切衆生，教化之極旨，唯悉以菩提大樂如金剛經云：「如是衆生之類，皆令入無餘涅槃，而滅度之。」故云「悉以大樂」。當知愚痴是生死因，生死是愚痴果，愚痴卽生死根本也。多聞是智慧因，智慧是多聞果，因智慧故，成就辯才，教化衆生，悉以大涅槃樂，是則智慧是涅槃因。涅槃是智慧果，智慧卽涅槃根本也，知此二種根本，非多聞不爲功，是以菩薩常念多聞，多聞爲進菩提證涅槃之初階也。

應如第一覺結文云：「如是觀察，漸離生死」，若能如是深心觀察，方知愚痴，確爲生死根本，應速廣學佛法，多聞經教，增長真實智慧，方能鑒別世出世法之關鍵。世法之五常八德，是我國古聖賢三千年之垂教不朽，固不可違。當以道德文章，以先覺，覺後覺，培植社會人才，依之建家立國，足以利益民生；然世智辯聰：無論科學，電學，種種工巧百技，雖可提高生活，亦不過現生享受，乃至醫學昌明，移植臟腑，亦只能醫病，終不能醫命。卽使X光鏡；只能透視肉團，何能照見本心，是則世間智慧，云何消滅愚痴，拔除生死根本耶？是故欲明心見性，解脫生死，惟有廣學五明，以應機宜，（五明者，聲明，工巧明，醫方明，因明，內明）。多聞佛乘，以明教理，了知愚痴生死，惟心妄現，領悟諸法實相無相，增長出世智慧，成就四種辯才，凡有所說，皆是佛法，教化一切衆生，皆發菩提心，行菩薩行，務令聞法者，依教奉行，悉皆成佛，卽平等與以無餘涅槃之大樂，永離生死大患，是則自他兼利，傳燈不絕，續佛慧命，故上云此覺法示行者，從觀行入相似，分證之位也明矣。

（未完）